



COSTA BRAVA, MI AMOR

Usnio sam kako Latinska Amerika
opet vjeruje u utopiju
i da je svima jasno kako raj ne postoji.
Usnio sam dva mala grada na obali Španije.
Blanes i L'escala.
Dva mala grada u kojima smo živjeli.
To već nije san.
To je istina koja se u njega upetljala.
Usnio sam tvoj dolazak svojim rođenjem.
I kako se smeće pod tvojim rukama
pretvara u biserje.
Usnio sam kako otvaramo detektivsku agenciju
ti poput starog pseta odbijaš nove trikove
i ja umirem za pičkom
sa prstom na obaraču kolta koji smo zadužili.
Ljudi spletkare, ubijaju i varaju
posla ima i previše.
Usnio sam gerilu u Hondurasu
i kazamate Čilea
odsječene ruke Victora Jare
i kuću Dylana Thomasa.
Ti u njoj navlačiš odijelo pajaca
i još jednom rušiš književne sisteme.
Mene nagovaraju da postanem trockista.
Mediteran nam se predaje.
Kad te Pinochet proglasi teroristom
možeš biti siguran da si uspio.